

新元史

第三八册

列傳第四十

新元史卷之一百四十三

賜進士出身日講起居注官翰林院侍讀國史館纂修膠州柯劭忞撰

石珪 天祿

王珍 文幹

楊傑只哥

劉通 復亨

劉斌 思敬

趙柔 晟

耿福 繼元

石珪泰安新泰人體貌魁偉倜儻不羈金末渡河率少壯據險自保與滕州陳敬宗破張都統等兵於龜蒙山又敗宋將鄭元龍於亳州乘勝引兵入盱眙會宋賈涉誘殺漣水忠義軍統轄季先衆迎珪爲帥稱爲太尉太

祖十三年使葛不罕與宋議和明年珪令麾下劉順觀
太祖於塔什干城太祖慰勞順且敕珪曰如宋和議不
成吾與爾爲一家勿憂不富貴順還告珪珪感悅日夜
思降十五年宋果渝盟珪棄其妻孔氏子金山仗劍渡
淮宋將追之曰太尉還完汝妻子珪不顧宋將沉珪妻
子於水遂率順及李溫等歸木華黎木華黎承制拜珪
光祿大夫濟堯單三州兵馬都總管山東諸路行元帥
府事佩金虎符便宜從事後金棄東平珪與嚴實分守
收輯濟堯沂滕單諸州十八年加金紫光祿大夫東平
兵馬都總管山東諸路都元帥秋七月珪攻克曹州與

金將鄭從宜戰馬仆爲所獲送至汴金主壯其爲人誘以名爵曰吾身事大朝官至光祿復能受封他國耶假我一朝縛爾以獻金主大怒蒸殺於市珪怡然就死色不變其部下立祠兗州祀之子天祿

天祿襲父爵授龍虎衛上將軍東平路元帥佩金虎符時宋將彭義斌取大名及中山天祿從李里海敗之又敗金將武仙屢立戰功國王李魯奏遷金紫光祿大夫都元帥太宗四年從皇太弟拖雷伐金率戰船夜至歸德城下襲其營殺三百餘人金將陳防禦來追天祿回軍復戰金兵退走明年秋九月破考城復圍歸德冬十

二月歸德降六年入覲改授征行千戶濟兗單三州管民總管七年從扎刺溫火兒赤渡淮攻隨州至襄陽夾河寨敗宋兵又從攻蘄黃等州時詔天祿括戶東平軍民賦稅並依天祿已括籍冊嚴實不得科收天祿病不任職以子興祖襲明年卒年五十四子十人興祖襲千戶官武略將軍從伐宋攻鄂州至元四年由宿州率所部抄汾淮諸郡俘獲甚多統軍司賞馬二十匹銀五百兩錦二十端十二年攻常州爲先鋒功在諸將上宋亡第功擢宣武將軍管軍總管戍温州平土賊林大年等招輯南溪山寨歸農者三萬餘戶十六年晉顯武將軍

佩金虎符十九年七月卒於軍子璉嗣

王珍字國寶大名南樂人金末所在盜起南樂人楊鐵槍聚衆保鄉里珍從之大兵略地河朔鐵槍迎降署珍軍前都彈壓鐵槍戰死衆推蘇椿代領其衆宋將彭義斌侵大名椿戰不利降之義斌遂據大名珍棄其家間道走還軍中按只吉歹大王嘉其誠心歸附以爲義子復從速魯忽擊走義斌蘇椿以大名降歸珍妻子珍語之曰吾非棄汝輩誠不以私愛奪吾報國之心聞者稱歎授鎮國上將軍大名路治中軍前行元帥府事俄遷輔國上將軍復授統攝開曹滑濬等處行元帥府事兼

大名路安撫使蘇椿有異志珍覺之與元帥梁仲先發兵攻椿椿開南門遁國王幹真授仲行省珍驃騎衛上將軍同知大名府事兼兵馬都元帥從速不台經略河南破金將武仙于鄭州復與金人戰于蕭縣斬其將頃之仲死國王命仲妻冉守真權行省珍爲大名路尙書省下元帥將其軍國用安據徐邳珍從太赤及阿朮魯攻破之授同簽大名行省事從伐宋破廬壽滁等州珍常身先諸將宋城五河口珍帥死士二十人奪之乘勝連破濠泗渦口太宗二年入朝授總帥本路軍馬管民次官佩金符珍言於帝曰大名困於賦調貸借西域賈

人銀八千錠及逋糧五萬斛若復徵之民無生者矣詔
官償所借銀復盡蠲其逋糧已而朝廷議分蒙古漢軍
戍河南以珍戍睢州修城隍明斥候宋兵不敢犯定宗
三年入朝晉本路征行萬戶加金虎符在鎮九年卒年
六十五子文幹

文幹善騎射襲爲行軍萬戶從世祖攻鄂州先登中流
矢賜良馬金帛李璫叛從哈必赤大王討平之論功第
賞文幹曰增秩則榮及一身賜金則恩逮卒伍迺以白
金二千兩器血百事雜綵數百縑賞之文幹悉頒於軍
中中統三年制父兄子弟並仕者罷其子弟文幹弟文

禮爲千戶文幹自陳願解己官而留文禮詔從之改同知大名路總管府事累遷河東山西道提刑按察副使近臣言其鄂州之功晉僉東川行樞密院事厯金州衛輝東平總管改江東建康道提刑按察使卒於官年五十八發其篋中錢僅七緡貧不能歸葬人以此稱之

楊傑只哥大興寶砥人少有勇略大兵略地燕趙率族屬降附從攻遼東又從元帥阿朮魯克西夏諸城有功太宗元年皇太弟拖雷賜以金幣命從阿朮魯攻信安阿朮魯知其材出諸將右命裁決軍務信安城四面阻水其帥張進數月不降傑只哥曰彼恃巨浸我師進不

得利退不得歸不若往說之進見其來怒曰吾已斬二使汝不畏死耶傑只哥無懼色從容言曰今齊魯燕趙地方數千里郡邑皆聞風納欵獨君恃此一城亡可立待爲君計不如歸附可以保富貴進默然曰姑待之凡三往乃降三年大名守蘇椿叛討獲之衆議屠城傑只哥曰怒一人而族萬家非招來之道也衆是其言由是滑濬等州皆下四年大軍攻徐州阻河不得濟傑只哥率勁卒憑河奪賊舟楫衆遂畢渡獲河南諸郡降人三萬餘戶進圍徐州金將國用安拒戰傑只哥率百餘騎突陣大敗之皇弟拖雷賜名拔都授金符命總管新附

軍民七年太宗特賜傑只哥種田民戶租賦九年從阿朮魯攻歸德傑只哥麾諸將縛草作筏渡濠抵城下梯城先登拔之乘勝得五州十縣四堡二寨十年宋兵至傑只哥率舟師擊之轉戰中流溺死年四十子孝先孝友孝先僉江北淮東道肅政廉訪司事孝友鎮江路總管

劉通字仲達東平濟河人初從嚴實來歸收濮曹相潞定陶諸州縣實薦於太師木華黎以通爲齊河總管尋授鎮國上將軍左副都元帥濟南知府德州總管行軍千戶太宗賜金符擢上千戶宋將彭義斌攻齊河城已

登陴通率六七人鼓譟而進宋人驚墜溺死者甚衆明日復圍城三匝通令守陴者植槩如櫛俄撤去宋人懼其出攻遂引退九年遷德州等處二萬戶軍民總管卒子復亨

復亨襲行軍千戶從嚴實略安豐通泰淮濠泗蘄黃安慶諸州憲宗西征復亨攝萬戶統東平軍馬攻釣魚山苦竹寨有功師還兼德州軍馬總管中統元年率所部戍和林還授虎符進武衛軍副都指揮使李璫叛遣使招復亨復亨斬之時諸軍乏食復亨出其私蓄以濟師世祖嘉之賜白金五千兩復亨固辭至元二年進左翼

侍衛親軍都指揮使四年遷右翼九年加昭勇大將軍
鳳州等處經略使十年遷征東左副都元帥統軍四萬
戰船九百征日本由博多舍舟登陸屢敗日本兵進至
今津戰於百道原復亨披赤甲縱橫指揮鋒銳甚日本
將三郎景資射復亨墜馬乃引軍還事具日本傳二年
授昭信路總管十四年遷黃州宣慰使十五年改太平
路總管俄授鎮國上將軍爲淮西道宣慰使都元帥二
十年加奉國上將軍三月卒五子浩澤澧淵淮浩中統
四年襲千戶至元八年歿於兵澤由近侍出爲荊州湖
北道宣慰使澧知長寧州俱蚤卒淵至元十一年佩金

符授進義副尉爲徐邳屯田總管下丁莊千戶九月領兵巡邏泗州至淮河九里灣遇宋兵奪其船三十餘艘十二年三月與宋安撫朱煥戰於清河敗之擒十四人奪其輜重九月從右丞別里迷失攻淮安十三年與宋人戰於昭信軍南靖平山俱有功十四年入覲進武略將軍管軍總管十五年從元帥張宏範征閩廣諸州以功授武德將軍十六年從攻崖山宏範命淵領後翼軍水戰有功十七年進安遠大將軍爲副招討二十一年遷潁州副萬戶二十四年從征交趾鎮南王脫歡命別將二萬人攻萬劫江又攻靈山城大敗賊衆還師討浙

東土寇平之三十一年兼領紹興浙江五翼軍守杭州
大德十一年卒子無晦至大元年襲授昭信校尉潁州
副萬戶延祐五年以病免六年改河南江北行省都鎮
撫泰定四年加宣武將軍卒

劉斌濟南厯城人少孤鞠於大父有勇力從濟南張榮
起兵爲管軍千戶太宗四年以功授中翼都統從攻歸
德軍杏堆距陳州七十里聞金兵屯州城外斌率衆夜
破之又襲敗太康兵拔其城移屯襄陽軍乏食斌知青
陵多積穀陳可取狀衆難之斌叱之曰青陵前阻大澤
彼恃險不設備可必勝也乃率百騎夜發行大澤中五

十餘里遇敵兵斌揮槩突擊敗之獲其糧數千斛從攻六安先登破其城擢濟南推官授本道左副元帥擢濟南新舊軍萬戶移鎮邳州憲宗九年病謂其子曰居官當廉正自守毋黷貨以喪身敗家語畢而逝年六十有二追贈中奉大夫參知政事護軍彭城郡公諡武莊子思敬

思敬賜名哈八兒都襲父職爲征行千戶世祖南征從董文炳攻臺山寨先登中流矢傷甚帝親勞賜酒易金符中統二年授武衛軍千戶從討李璫賜銀六十錠四年授濟南武衛軍總管捕盜有功又賜銀千兩至元三

年授懷遠大將軍侍衛親軍左翼副都指揮使四年命
築京城八年授廣衛將軍西川副統軍佩金虎符九年
宋嘉定守臣咎萬壽乘虛襲成都哈八兒都邀擊之戰
於青城宋兵大敗奪所俘二千人還十二年轉同僉行
樞密院事復攻嘉定取之瀘叙忠涪諸郡及巴縣籌勝
龜雲石筍等寨十九族及西南夷五十六部悉來降十
三年圍重慶敗宋將張萬得其舟百餘六月瀘州復叛
殺哈八兒都妻子哈八兒都討擒其將任慶攻破盤山
寨俘九千餘戶又獲其將劉雄及王世昌等夜入東門
巷戰殺王安撫等遂克瀘州復攻重慶其將趙牛子降